

## Abukat

Žalit će te stari, mladi  
 Suze će teć va paradi  
 Ča su prošli ludi dani  
 Žalit će i kapetani

"LENČINA" se niš nij boril  
 Da bi bolji život stvoril  
 I sničin se on nij bavil  
 Zatoj malo i ostavil

Želja mu je zadnja sada  
 Da v Sabori sloga vlada  
 Va jednon se lipo slažu  
 Si jednako dobro lažu

Društvu z Graca on ostavlja  
 Dug život i puno zdravlja  
 Kad po noći vani zebu  
 Da od zime ne najebu

Sitili se oni tome  
 Doček na otvorenome  
 Čekali su oni eto  
 Pokraj cisti Novo leto

Ako se i kletu slože  
 Neka oganj bar nalože  
 Ma pomalo neka gori  
 Da Božićnjak ne izgori

Veseli su jako bili  
 Kad Božićnjak su kitili  
 Lipe pismi društvo bira  
 Harmonika totu svira

Još je jedna ostavina  
 Za Matu Veronikina  
 Ostavlja mu dobre nadi  
 Udovice kada gladi

Mata sebi društvo bira  
 Ne sida već do Smovira  
 Nigda uvik skupa bili  
 Zbog žen su se zavadili

Još ga to va srce dira  
 Pozdravil bi i Smovira  
 Neka Mati se ne grozi  
 Da Opela sretno vozi

Se smo dali čaj ostalo  
 V oporukij bilo malo  
 Lipi pozdrav puče mili  
 Skoro bi na kraji bili

Sad van još divanin ovo  
 Stvarnoj sada se gotovo  
 Ki stojite, ki sidite  
 Na sprogod mu si pridite

Tambur

## Sudac

Mene ovo jako brine  
 Kako brzo leti vreme  
 I prebrzo lete dani  
 Leto dan je već od lani

Svoj ću posal ja obaviti  
 Najprije vas gren pozdravit  
 Pozdravljan se desno, livo  
 Da ne bude komu krivo

Zato malo se sekiran  
 Kakoj čovik orjentiran  
 Ki su skloni desnoj strani  
 Ki livo orjentirani

Kij za svađu, kij za slogu  
 Toj sejedno dragon bogu  
 Bog ne čuje još od prije  
 Ča magare sako blije

Jedan pozdrav s puno nade  
 Tebi stari Bribir grade  
 Povijesno si neokaljan  
 Srdačno te ja pozdravljan

Mi ki nismo odselili  
 Volimo te grade mili  
 Si ki totu smo ostali  
 Su ljubav smo tebi dali

Bribirac kij diljen svita  
 Za rodni kraj uvik pita  
 Koda srce in procvate  
 Va svoj Bribir kad se vrate

Da se kigod ne najadi  
 Jedan pozdrav novoj vladi  
 Prošla vele, nij valjala  
 Ta ni ukrast da nij znala

Nova će bit dobra jako  
 Nadamo se baren tako  
 Moren van reć tek toliko  
 Sakud će teć med i mliko

Poli nas je teško stanje  
 Ovoj ludon radovanje  
 Toj za narod slaba srića  
 Zač državnaj prazna vrića

Kad nimaju ljudi dela  
 Nestašica pride vela  
 Ovo bode me va živac  
 I "LENČINAJ" totu krivac

Ja san zato poslan simo  
 Da "LENČINU" osudimo  
 Osudit ću ovo smeće  
 Dragi Bog mu pomoć neće

Tambur

## Abukat

Na zalaskij svitlo danje  
Pozdrav lip i poštovanje  
Ovoj pozdrav puku momu  
Stanovništvu Bribirskomu

Ovoj točno nisu vici  
Tri frizerki i tri brici  
A okupi mnoge ljude  
Kad misečni sajam bude

Pozdravljan vas na se strani  
Moji dragi sugrađani  
Ne gljedajte vame belo  
Bribir je grad a ne selo

Jedino ča teško pada  
Radnih mest je malo sada  
A poraznoj stanje velo  
Malo ih i išće delo

Si ki totu ste nazočni  
Podaci van dajen točni  
Ne divanin ja jedini  
Bribir je grad od davnini

Ja ovako na to gljedan  
Nij "LENČINA" samo jedan  
Nikako se ipak živi  
Sudac samo njega krivi

Ne gajimo lažnu nadu  
Da baš sličī pravon gradu  
Ne gradu va novo vrime  
On prošlosti nosi brime

On je takov mi to znamo  
Ma nij prošal on nikamo  
Sa sudbinun tun se miri  
Lipoj ostal va Bribiri

Zabadava ime grada  
Kad nij posla ni zarada  
Gljedat samo zidi sivi  
Od prošlosti se ne živi

Nikomur se ta ne grozi  
I auto novi vozi  
Jedino ča narod čuje  
Da ga žirant otplaćuje

To moran reć to priliči  
Bribir ipak na grad sličī  
Četiri su trgovini  
Jednaj mislin na Kričini

Stranački on nij zadojen  
Sirotinjski tu odgojen  
Zami malo si oduška  
Tebij suče prazna puška

Tambur

## Sudac

Ostavlja na vrh stranici  
Joži Škodi, a i Mici  
Ostavlja in tuja nišća  
Za lisice lovit klišća

Opre vrata, dobro pazi  
Ma lisica ne izlazi  
Na gotovs je puška stala  
A lisica već krepala

—

Ne zan točno va ku dobu  
Lisicaj šla va konobu  
Vrat šupa toj, u redu  
Tuda mački nutar gredu

Bori daje on Mureti  
Dobra čaja tri paketi  
Od probrana bilja suha  
Pa susedu neka skuha

Jadna lija lačna bila  
Maćkan jilo se pojila  
Mordaj bilo to na Badnje  
Bilo joj je jilo zadnje

Moran ovo reć najprvo  
Plovanić muj pilil drvo  
Va dvori mu drvo leži  
Kratak trupčić jedan teži

Nič v konobi jako lupa  
Va akciju Vidra stupa  
Vidra grize, Joža tuče  
Lisica se v kraj odvuče

Joža ima pilu jaču  
Kašnje će poč na pijaču  
I tvrda su drva suha  
A Ivanka čaj in kuha

Tu lisica dosti dobi  
Zapru vrata od konobi  
Jedno drvo v školju rinu  
Šli po "Canu" na Kričinu

Dva su riza prepilili  
Gotovi za minut bili  
Boro pita toj u redu  
Ča san dužan ti susedu

Pride stvarno "Cane" totu  
Komanduje Joži sprotu  
Opri vrata, stani v stranu  
Konoba mij na nišanu

Pokraj čaja kad su seli  
Trejset kuna Joža veli  
Evo dvajspet sil me svatil  
Sa pet kun san čaj naplatil

Tambur

## Abukat

"LEŃINA" se rado sića  
Teca Joži Plovanića  
Zadnji tren sej ovo sitil  
Dvi kazeti muj nahitil

Za video su kazeti  
Pešun mora mu donijeti  
Se o seksu moj nebore  
Neka gljeda ih do zore

Familija dnevnik gljeda  
Ali Joža dalje neda  
To sam gljeda, više-manje  
Drugi pod mus na spavanje

Na spavanje oni gredu  
Video je tad na redu  
Na kazeti mladi goli  
Ovo Joža strašno voli

Gljedat počne još za rana  
Ne prestaje se do dana  
Kadgd misli gljedat oće  
Ali samo do polnoće

Najčešće van ovo biva  
V seksi Joža baš uživa  
Ženska jedna jedva diše  
A Joži se ne spi više

Se kazete dva put gljeda  
Onda teče do suseda  
Ne žali on zato kuna  
Do Nikoli gre Pešuna

Naređuje, a ne prosi  
"Večeras dvi nove nosi"  
I Nikoli srce lupa  
Kad gljedaju nove skupa

Guštiraju bez nervoze  
Novi seksi, nove poze  
Ti prizori dušu liječe  
Obadva se vato zbeče

Jedno vrime Pešun gljeda  
Pa gre doma radi reda  
Da ne bude brodoloma  
Ivanka ga čeka doma

Joža lipo dalje gljeda  
Dobar prizor spat mu neda  
Kad kazeta steče cela  
Evo već i dana bela

Krene va grad ma po dani  
Razbistri se na Pilani  
Po Vrbi se malo šeće  
Zač va bife pospan neće

Tambur

## Sudac

Stani dečko malo sada  
Poštujen te tako mlada  
Živio mi branitelju  
Ali poštuj moju želju

Argumenti su mi čisti  
Pred ljudi smo evdi isti  
Prije neg se pokaramo  
Ja bin otel jedno samo

Ljudih bin se sitil malo  
Va pameti čaj ostalo  
Zač sej toga sitit milo  
Onoga čaj prije bilo

Uspomeni nan ne fali  
Za nas ki smo tu ostali  
Suza mi na oči pada  
Zač si nisu evdi sada

Sake sitin se paradi  
Dečkih ki već nisu mladi  
Mislin kodaj bilo lani  
Ki su bili kapetani

Po selih se jilo, pilo  
Pijanih je uvijek bilo  
Znalo sej va krugi užen  
Kij čovik za ča zadužen

Ivej Rudin bubanj tukul  
Ali mu nij nikad pukal  
V sakoj kući vina lonac  
Kapetan je bil Antonac

Zna se i ki barjak nosi  
Podskoči se s tin ponosi  
Na začelju, a ne vodić  
Čestoj bil i Ljubo Škodić

Kad bi prišli na Kričinu  
Digli ljudih i dičinu  
Frana pokojni Lavina  
Va kabličij nosil vina

Kad bi prišli do Podgora  
Spomenut se i to mora  
Oduška bi srcu dali  
Rado su nas dočekali

Kad bi prišli, neka živi  
K Vlasteliću tecu Ivi  
Valje k nami sej privukal  
I kroz selo bubanj tukul

Spomenul bin Spećinara  
Zavoj imel puno dara  
Pismaj bila uvijek prava  
Pa nekamuj vječna slava

Tambur

## Sudac

S ke god strani dalje krenen  
Neću moć da sih spomenen  
Preskočit se to nesmiye  
Piscih naše šentencije

Moran ove riči rabit  
Bribir neće ih pozabit  
S podaci se tu barata  
Iza drugog svjetskog rata

Tetac Pave najstariji  
Sin mu Joža poznatiji  
On je slovil za pjesnika  
A obadva "Pukovnika"

Punoj dal i Jurčić Rajko  
Alij umrl rano jako  
Nisu riči zabadava  
Nekaj i njin vječna slava

Ov običaj naš šaljivi  
V zimi Bribir naš oživi  
Kukavic je bilo malo  
Komu ovo nij štimalo

Bilo ih je to smo znali  
Ki su i dvor zapirali  
"LENČINA" će reć pošteno  
Neka in je oproščeno

Zad paradi naše stare  
Biloj uvik i magare  
Magarac il magarica  
Na samari barilica

Nij to radi formi bilo  
V barilicij vino bilo  
Uz magarca toga siva  
Bil je Predoj ili Živa

Va Riku se nij hodilo  
Lipo nan je i tu bilo  
Va mačkarah ljudi, ženi  
Si maskami pokriveni

To problemi nisu mali  
Da prepoznaš ih va sali  
Tu si mogal postaz bena  
Mogljaj ti ofirat žena

Sićanje to vrnut neće  
Nova mladost s novin kreće  
Neka društvo ovo mlaje  
Bati svoje običaje

Punoj ta muzika naša  
Prominila muzikaša  
Na svoj način je svirala  
Još Hrvatska nij propala

Tambur

## Sudac

Ostavina jedna viša  
Starin dečkon daje miša  
Bilo kraći ili duži  
Samo svrhi da posluži

Ovoga ča sad imaju  
Služi samo da pišaju  
A "LENČINA" za njih mari  
Da ne budu dečki stari

"Stari dečko" lanjsko ime  
malo smo postigli time  
zač od cele te Armade  
Oženil sej samo Rade

Oženil sej daj milina  
Uz ženu još dobil sina  
Toj za njega dar od Boga  
Othranit će kot i svoga

Stare cure isto brine  
Jel kakov dar od "LENČINE"  
Svojega in ni ostavil  
Ni se on sotin bavil

Bil muj velik i to dosti  
Ma nij mogal od lenosti  
Lenost krsta jako šundra  
Bil muj labav kot i žlundra

Zato starin curan nudi  
Kad već nisu našle ljudi  
Vibrator in daje fini  
I to bome s tri brzini

Da ga kupi triba soldi  
A ta vrag je sad va modi  
Koristi ga, mor nis bena  
Pokraj muža kagod žena

Udovice on pozdravlja  
Niš in ov put ne ostavlja  
Onu stvar za kugod mlađu  
Nij ostavil nek se snađu

Stare već ne misle nato  
Ne bi pa daj čisto zlato  
Te starije samo brine  
Otel krešit mirovine

Za udovcih, njih je malo  
Njin bi jednoga tribalo  
Zgljedali su nigda muški  
Ali su sad prazne puški

V kući ženske bi tribale  
Ma penzije su in male  
Kad bi malo veće bile  
Morda bi se pomamile

Tambur

## Abukat

Branil san ga zabadava  
Ode momu klijentu glava  
Su snagu san bil upregnul  
Istoj papki on otegnul

Ubil si ga, e pa neka  
"Lenčinaj" znal ča ga čeka  
Pokazal mij bez divana  
Oporukaj napisana

Spominje va oporuki  
Da su obi prazne ruki  
Se čaj imel daj to spiskal  
Posla nikad nij ni iskal

Roditeljen niš ne nudi  
To su dosti stari ljudi  
Ne triba in ostavine  
Socijalno za njih brine

Za paradu samo pusa  
Izdali ga kot Isusa  
Se zlo ča su načinili  
Na njega su prehitili

On se na njih malo jadi  
To su redon dečki mladi  
Po selu se raštrkaju  
Svetojurca ne slušaju

Istoj ova glava luda  
Sitila se našeg KUD-a  
Družinaj to veli prava  
A delaju zabadava

Pohvalit se društvo mora  
Za nastupi od folkloru  
V Zagrebi su lani bili  
I Primorje predstavili

Pratila ih tamo srića  
Na Trg Bana Jelačića  
Zaboravit to se neda  
Pol Hrvatske tu ih gljeda

Iza toga bože mili  
Si skupa na maši bili  
Svetu mašu tu slušali  
V Zagrebačkoj katedrali

A za smotru jednu drugu  
Putovali prema jugu  
Nastup veli, a ne pići  
Bribirci va Metkovići

Za nastupe se pohvale  
Ambicije nisu male  
"Lenčina" in daje nadu  
Morda pojdu va Kanadu

Tambur

## Abukat

S tobun suče se je teže  
Pusti mrtvih, neka leže  
Zač skrećeš na drugu stranu  
Stin smetaš mi obranu

Ti si druge teme gudil  
Koda si ga već osudil  
Više bodeš neg ostrugi  
Uvik su ti krivi drugi

Koda ljudski nisi stasal  
Za koga si reci glasal  
Sil pobjedu ovu čekal  
Sil praščića i ti pekal

Izvori su jedni rekli  
Da su nigdi vola pekli  
Puno ih je peklo prase  
Pobjedil je i to "zna se"

Va izbornon onon kolu  
Izmislili su parolu  
Da Hrvatsku pokrenimo  
Samo ako pobjedimo

Pred trinajst let već su bili  
Ovi isti pobjedili  
Hrvatsku su pokrenuli  
Naopak ja okrenuli

Okrećuć je čaj otpalo  
To sej redon i pokralo  
Pretvorbe bile takove  
Va mutnon se ribi love

Lipa naša domovino  
Meni voda, tebi vino  
O radnička klaso mala  
Na prosjački šćap si pala

Kij bil gore, sad je dolje  
Nadamo se bit će bolje  
Ja nis ludu travu pasal  
Narod je to sam izglasal

Live stranki ne srame se  
Ti čelnici misle nase  
Koda jedva su čekali  
Da se briga sa njih svali

Prepali se kot dičina  
Sličan in je naš "LENČINA"  
Samo njemu sudit gredu  
Njihov status je u redu

Ti "LENČINO" smiron budi  
Zač ovo se tebi sudi  
Ti niš nemoj da se sramiš  
Najbolje se šutnjom braniš

Tambur

## Sudac

Bribirac se saki siti  
Kadi god on bil va sviti  
Lice mu se tad ozari  
Za običaj ov naš stari

Sad je Amer, ima ženu  
I prkosi Bin Landenu  
Ne boji se taj potresa  
Samo kad muj dosti mesa

Suza mu na oko pada  
Daj bar evdi s nami sada  
Pa da čašun nan nazdravi  
Da po celon svitu pravi

Vele ki su prošli mora  
Daj to kruh sa sedam kora  
Težak život te ne mazi  
Neka dragi Bog ih pazi

Va sakon ih ima gradi  
Kigod fali va paradi  
Dosti ih je va Afriki  
I v Sjevernoj Ameriki

Jedan put mij Bule rekal  
On iskustvoj velo stekal  
Kad nevrime brod zavože  
Tad pomozi dragi Bože

Va svakoj ih ima sferi  
Mikaj Juran va Camberi  
Na brod je šal dosti rano  
I Kurelac naš Silvano

To postane vela briga  
Većina po brodu riga  
Ovo nij laž, ovoj zbilja  
Poriganaj i postilja

Za Kurelca sad se čuje  
Da va fušu zarađuje  
Puno keša zato zame  
Kad se svlači za reklame

Miculinić Braco bira  
Njemačku, pa tamo svira  
S njim Piškulić Vlade gudi  
Dobar duet vele ljudi

Na brodi ih ima više  
Ki će se to da opiše  
Toj posal za one mlaje  
Željko Tićak odustaje

I Marijaj prošla tamo  
A ča dela to ne znamo  
Znamo otkud smrdi riba  
Morda in pevaljka triba

Tambur

## Sudac

Abukatu ča tu cviliš  
Ti savjeti meni diliš  
Baš si bedast gron te ubil  
Ča ne vidiš da si zgubil

Branit krivca nij to lahko  
Vjerujen ti daj to tako  
Podatak je ovo ružan  
Skoroj saki lokal dužan

Obrana ti baš ne štima  
I propustih puno ima  
Ki vrag više zate mari  
Kad s vrimenon krst ostari

Se Općina čaj izdala  
Ni pol novca nij ubrala  
Vrimena su prišla luda  
Nij pomoći ni od suda

Kad z Novoga Zlatan vozi  
Zabeći se pravo skrozi  
Tako vozeć, veruj meni  
Ne vidi na cisti ženi

Za jednoga zijan "BRAVO !"  
Toj naš bife zvan "BADAVO"  
Podatak je iznest nužan  
Toj jedini ki nij dužan

Svoje ženi, a ne tuje  
Vrag zna dal još dobro čuje  
On gre doma va auti  
Evu ne vidi na puti

Istaknut se ovo mora  
Toj pohvala za Davora  
I osoblje ko podvara  
Nada, Eca i Barbara

Pride doma, nij mu ženi  
Zlatko valje se okreni  
Pa gre nazad uz Pešuna  
Mora po nju zač je vuna

Toj jedino za pohvalu  
Tu iznimku dajen malu  
Za druge se pomolimo  
Kad općinu odvojimo

Najde Evu nigdi v Gradi  
Valje se razgoropadi  
Prigovara kud se skita  
Dal ti vidiš Eva pita

Jel za se kriv ta "LENČINA"  
Ne zna narod ni općina  
Za Lenčinu tu nij žitka  
Njemu sudi sablja britka  
(Udarac sabljun)  
Tambur

## Sudac

Gremla malo va Podskoči  
Da se ovo ne preskoči  
Spomenimo malo Micu  
Našu vridnu poštaricu

Da se Mica sačin bavi  
Uvik niki to dojava  
Vridna žena i to štima  
Vele puno kokoš ima

Kad zovala dosti strese  
Saka kokoš dobro nese  
Kad sabere dosti jaja  
Ondaj vela rasprodaja

Lani dosti ih skupila  
A prodaja slaba bila  
Kodaj juj ujila muha  
Od jada ih puno skuha

Toj istina, a ne šala  
Dušanki ih dvajset dala  
Ali ne kćeri Dušanki  
Nego siroti bosanki

Količinaj ovo vela  
Bosanka ih lipo zela  
Čoće pamet da joj soli  
Ali jaja baš ne voli

Neće ona odbit dara  
Ma odluku svoju stvara  
Kašnjej v njazlo jaja stresla  
Kadij jedna kokoš nesla

Mica zato niš nij znala  
Drugi dan je jaja brala  
Malo joj je čudno bilo  
Puno ih sej sakupilo

Mušterije niš ne znaju  
Kad ih nosi na prodaju  
Si veruju oni Mici  
V Grižanih i Crikvenici

Jedna žena v Crikvenici  
Matere se sića Mici  
Kolači gre delat ona  
Kljane Micu bez pardona

V jaja gljeda žena grdo  
Ko razbije, sakoj tvrdo  
Ko god jaje sej razbilo  
V Grižanih je isto bilo

Se sej tako rasprodalo  
Za Dulu nij niš ostalo  
Zato njega duša boli  
Dule friške popit voli

Tambur

## Abukat

Sudac bunca sasin sega  
Okrivljuje za se njega  
Zna se daj "LEŃINA" vela  
Ali reci kadij dela

Va Bribiri si to znaju  
Lokali se zapiraju  
To divanin ja bez brigi  
Zapiraju i butigi

Na malih je vratih bila  
Apoteka majko mila  
Nju smo stvarno tu tribali  
Ali smo joj vritnjak dali

Zač ne dela više ona  
Zvana "Vrba" gostiona  
Jel "LEŃINA" kriv i za to  
Ja se ne bin pačal vato

Pravij lokal bil na Vrbi  
Nek se češe koga srbi  
Tu komentar i nij nužan  
Kij tu komu ostal dužan

Jel njegova i to briga  
Ča sej zaprla butiga  
"Frankopanu" ni spomenka  
Nij renola ni "Rumenka"

"Rumenko" se drži grada  
On je gradski čovik sada  
Ni mu lahko, veruj meni  
Triba bena da se ženi

Makar našal i stariju  
Glavno da se skupa griju  
Zač muj rekla ona bivša  
"Je ljudina, ma nij miša"

Va velu smo prišli krizu  
Ča posla nij nigdir blizu  
"Viševicu" već su bili  
I radnici prežalili

I s DIP-on je isto bilo  
Biloj dobro pa finilo  
"Sagenu" su baš po meri  
Zajebali menadžeri

Menadžeri to su veli  
Se čaj dobro sebi zeli  
Neznan bil povidit znali  
Šće su ono Bože hali

Dal ti se čvrljeni lice  
Suče to su činjenice  
Reci pravo sil poludil  
Bil "Lenčinu" zato sudil

Tambur

## Sudac

Do "Dolčini" gremo sada  
Opisal bin ovo rada  
Požarići lani bili  
Svoj zlatni pir proslavili

Pedeset let sretnog braka  
I života sakojaka  
Va Meriki dosti bili  
I nazad se priselili

Spajala ih čvrsta vera  
Vele kodaj bilo čera  
Sad se lipo veselimo  
Z Merikij sin prišal simo

Zadatak si veli dali  
Su rodbinu su pozvali  
Spomenut i ovo vredi  
Pozvani su i susedi

Puno gostih, lipa slika  
Sa ženun je Božo Dika  
I da bude puna mera  
Rodbinaj tu iz Kičera

Da se od vrućini spasi  
Sidelo sej na terasi  
V kućij mesta, si to znamo  
Ali in je lipše tamo

Da in bude veselije  
Domaće se vino pije  
Uz vino sej dobro jilo  
Pečenkij ko drvlja bilo

Orančadu Ruda pije  
Ne smi vina ni rakije  
Kate se uz njega mazi  
I na svoga Rudu pazi

Rudi pride i do krize  
Nič ga oko srca grize  
Sekira se veruj meni  
Ča kraj sina nima ženi

Začula se pisma tada  
Brzo Ruda to prevlada  
Kad Podgorci zapivaju  
A oni to dobro znaju

Harmonika tu se čuje  
Lipa pisma odjekuje  
Slavljenicij pisma dira  
Harmoniku sin in svira

Va duboku noć se dalo  
Kad društvo je zapivalo  
"Kad bi ove ruže male  
Za bol srca moga znale"

Tambur

## Abukat

Nezgoda sej lani bila  
Andri Šecku dogodila  
To mij rekal, nij se zezal  
Kad je Miji baras vezal

Ljudi moji nij to lahko  
Zač je baras visok jako  
Pitursku mu stubu dali  
Baras visok, Andre mali

Kroz baras se van proteže  
S mukun Andre rozgi veže  
Stat na stubi to su muki  
Gori glava su i ruki

Nemirnaj mu noga bila  
I stuba sej prehitila  
Ruki mu na barsi jašu  
A nogi po zraku mašu

Na barsi sej tako vogal  
Daj pal još sej ubit mogal  
Ruki žicu čvrsto love  
Ne zna dal va pomoć zove

Sakoga zvat mu se ne da  
Spod cisti ga Cupač gljeda  
Mordaj Cupač Mile mislil  
Da sej Andre to obisil

Mladen Kršul tuda šeće  
Ali njega pozvat neće  
Da i pride veli sebi  
Dosegal ga isto nebi

Maloj prišal i va krizu  
Daj bar Vlada Veuc blizu  
Pomogal bi, majko božja  
On je visok kot i stožja

Tu su blizu Telebani  
Ali š njimi ne divani  
Na Vedrana nadi daje  
Tamo samo kucak laje

Kad muj bilo dosti toga  
Dragoga sej sital Boga  
A biloj mu stvarno grdo  
Bog visoko, doli tvrdo

Dušanka gaj opazila  
Na balkonij gori bila  
"Čaj to Andre, ki su vrazi"  
"Niš ne pitaj već silazi"

Tečuć doli brznoj stigla  
Stubicu muj va zrak digla  
Jedvaj Andre na se prišal  
Skoro v gaće sej popišal

Tambur



## Sudac

Va gori već vuci viju  
Zlatan je šal va penziju  
Vrime sada veruj meni  
Posvetit će svojoj ženi

Sa firmun je se gotovo  
Dočekal je on i ovo  
Nahodil sej on po gori  
Neka čovik se odmori

Ov slučaj iznašan eto  
Još je delal prošlo leto  
Slučajno sej tu zatekla  
To mij jedna žena rekla

Ne znan stel vi drugi znali  
On i Eva gljive brali  
Beru gljive iza rosi  
Zlatan sobun durbin nosi

Gre naprvo Eva vidit  
Zlatan će na panju sidit  
Evi berba nije teška  
A Zlatan se samo smješka

Livadaj uz jedno brdo  
A Zlatanuj hodit grdo  
Zlatanu se zgoru neda  
On samo va durbin gljeda

"Hodi gori" Evi veli  
"Eno gori nič se beli  
Niš ne moraš dušo pazit  
Ja ću ti ih pronalazit"

Lipo čuju se povici  
Zlatan zija po Novici  
Hodi ženo desno malo  
Nič sej tamo ukazalo

Sada hodi ali živo  
Malo gori polulivo  
Teče Eva livo desno  
Pa Zlatanu veli bjesno

Ti bi mogal da se stidiš  
Tu na panju doli sidiš  
Tobože mi pravac davaš  
A ti mene zajebavaš

V Šentenciji tako piše  
Sad vrimenta ima više  
Samo Eva da ne čuje  
Da pomazi žene tuje

Vrag je Zlatan, ma ne mali  
Još se svojin mišon fali  
Veli Eva, daj ne slini  
I miš je va mirovini

Tambur

## Abukat

Događaji dalje gredu  
Sudari su sad na redu  
Bilo ih je puno više  
Šentencija o tri piše

Počinjemo od Moskvića  
Našeg Joži Plovanića  
Ta Moskvić zelene boje  
Završil je vožnje svoje

Va podskočij za Moskvića  
Bilaj uvik slaba srića  
Nesrića ga prati luda  
Bolje da nij vozil tuda

Bil je ženskar, još se neda  
Pa okolo ženske gljeda  
Pogled krivo mu zaluta  
Pa završi pokraj puta

Zić ne more, Moskvić neće  
Nervozno se Joža šeće  
Pa na kraji šetnje ove  
Pešuna va pomoć zove

S traktoron gaj Pešun vukal  
Nij se jako ni rastukal  
Havarijuz imel manju  
Ostal je va voznon stanju

Drugi put je kobno bilo  
Kada mu sej dogodilo  
To su bili pravi šoki  
Baš va Parčevi potoki

S Podskoča se doma vraća  
Malo pažnje on obraća  
Nizbrdicaj majko mila  
A i cistaj mokra bila

Prebrzo gre Joža vidi  
Nemirno na sici sidi  
A na cistij mokro stanje  
Mogal malo bi pomanje

Zaustavit ga pokuša  
Ali Moskvić ga ne sluša  
Neće kola da mu stanu  
Pogađa va livu stranu

Totuz Moskvić bil va tesnu  
Zvrne se na stranu desnu  
Poziciju novu lovi  
Pa završi tu na krovu

Kroz poneštru van se zvuče  
Joža se po glavi tuče  
Prestrašen je jedva diše  
"O Moskviću nikad više"

Tambur

## Sudac

Kalafatić Zdravko lani  
Predizborni bili dani  
Istoj imel nepriliku  
Na zavoji v Driveniku

Sada moren i to reći  
Ljubo Škodić da je treći  
Vražjej imel nepriliki  
Kad sej doma vraćal z Liki

Predizbornaj to kampanja  
Auto na pravcu ganja  
Cista naglo livo skreće  
Ali Pežo livo neće

On i žena v Liki bili  
Dobro nisu se ubili  
Nij od toga bilo dugo  
Prava srića, a ča drugo

Nesrića se tu događa  
Va betonski stup pogađa  
Va betonski stup od struje  
Desilo sej, ča je tu je

Mokra cista, masna skliska  
Do susretaj prišlo bliska  
Mercedesuj razbil lice  
Ispod Luki jebalice

Neznan jel bil Zdrava svezan  
Jel bil pijan ili trezan  
Kad je prišlo tu do gusta  
Zdravaj razbil samo usta

Prišloj totu do udesa  
Šlepera i Mercedesa  
Biloj, stvarno ajme meni  
A misec je bil studeni

Ta sudar va Driveniku  
Autuj prominil sliku  
Na autuj vela šteta  
Nervozno se Zdrava šeta

Črna sreda muj u svjesti  
Datum je bil dvajst i šesti  
Nisu dobre mu prognoze  
V bolnicu ga v Riku voze

Nij prišlo do težeg loma  
Milivoj ga vozi doma  
Ki gaj vozil, šala pića  
Zdravko toga se ne sića

Od stvarnosti on ne bježi  
Kot mumija tamo leži  
Par dan nij s postilje zišal  
Na ležeć va gusku pišal

Tambur

## Abukat

I za lovcih dvi tri riči  
Spomenut ih to priliči  
Kako in se srića vrti  
Podaci su dosta škrti

Tu nezgodu ima malu  
Stupil je na drugu škalu  
Klobuk drži rukun malo  
Onda mu sej zamantalo

Stari lovci šalu znaju  
Mlaji služe da in laju  
Pripravnici to su oni  
Ča su uvik va pogoni

Istinaj to ljudi živa  
Va studenci Perko pliva  
Okolo njega lovci buče  
Nikako se van izvuče

Nij Ivica totu Šimac  
Zač on je već prvotimac  
Bil je pucal on bez stida  
Va jelena invalida

Na glavu gre valje ruka  
Ma na glavi nij klobuka  
V studencu se klobuk moči  
Onda Perko nazad skoči

O lovcih san evo krenul  
Malo Perka bin spomenul  
Do velika smiha pride  
Kada Perko va lov ide

Opet on na kraj dopliva  
Glavno da muj glava živa  
Sa društvon se lipo smije  
Ali mu se već ne pije

—

Lani mu sej jako pilo  
Va boci već niš nij bilo  
Biloj to na vedri dani  
Kraj studenca na Jerdani

S lovci se spomenut mora  
I Jadranka lovca Čora  
Bribirske ga oči vide  
Kada va lov simo pride

Hodeć čovik se ugrije  
Gre bar vodi da popije  
Šal je popit hladne vodi  
Tada mu se to dogodi

Na Trznici lov počinje  
Va Javorki već proklinje  
Teško se kroz travu ide  
Na Čokovo jedva pride

Tambur

**Šentencija mesopusta**

**2004.**

**LEŃČINA**



**Polak običaja i navade stare**

**Bribir 24. veljače**

**AUTOR : Ljubo Antić - "Škodić"**

**SUDAC : Domagoj Miculinić**

**ABUKAT : Danijel Grbić**